

摘藻堂四庫全書薈要

史部

欽定四庫全書蒼要卷五千四百三

舊五代史卷二

宋門下侍郎參知政事監修國史薛居正等撰

梁書第二

太祖紀二

光化元年正月帝遣葛從周統諸將畧地于山東遂次
于邢洺三月昭宗以帝兼領天平軍節度使餘如故四
月滄州節度使盧廷彥為燕軍所攻棄城奔于魏魏人

送于汴是月帝以大軍至鉅鹿屯于城下敗晉軍萬餘

衆于青山口俘馬千餘匹丁卯遣從周分兵攻洛州斬

刺史邢善益擒將五千餘人五月己巳邢州刺史馬師

素棄城遁去辛未磁州刺史袁奉滔自剄而死五日之

內連下三州因以葛從周兼邢州昭義軍節度使留後

帝遂班師是時襄州節度使趙匡凝聞帝軍有清口之

敗密附于淮夷七月帝遣氏叔琮率師伐之未幾其必

州刺史趙璠越墉來降隨州刺史趙匡琳臨陣就擒二

年正月淮南楊行密舉全吳之衆精甲五萬以伐徐州

帝領大軍禦之行密聞帝親征乃收軍而退時幽州節

度使劉仁恭大舉蕃漢兵號十萬以伐魏遂攻陷貝州

州民萬餘戶無少長悉屠之進攻魏州魏人來乞師帝

遣宋友倫張存敬李思安等先屯于內黃帝遂親征三

月與燕軍戰于內黃北燕軍大敗殺二萬餘衆奪馬二

千餘匹擒都將軍無敵已下七十餘人

軍可及幽州驍將號軍無敵

是月葛從周自山東領其部衆馳以救魏翼日乘

勝諸將張存敬以下連破八寨遂逐燕軍北至于臨清
壅其殘寇于御河溺死者甚衆仁恭奔于滄州六月帝
表丁會為潞州節度使以李罕之疾亟故也又遣葛從
周由固鎮路入于潞州以援丁會七月壬辰朔海州陳
漢賓擁所部三千奔于淮南戊戌晉人陷澤州帝遣召
葛從周于潞留賀德倫以守之未幾德倫為晉人所逼
遂棄潞而歸繇是潞州復為晉人所有十一月陝州都
將朱簡殺留後李璠自稱留後送款于帝三年四月遣

葛從周以充鄆滑魏之師伐滄州五月庚寅攻德州拔
之梟刺史傅公和于城上己亥進攻浮陽六月燕帥劉
仁恭大舉來援從周與諸將逆戰于乾寧軍老鵝隄大
破之殺萬餘衆俘其將佐馬慎交己下百餘人既而以
連雨遂班師八月河東遣李進通襲陷洺州執刺史朱
紹宗帝遣葛從周自鄴縣渡漳水屯于黃龍鎮親領中
軍涉洺而寨晉人懼而宵遁洺州復平九月帝以仁恭
進通之入寇也皆繇鎮定為其囊橐即以葛從周為上

將以伐鎮州遂攻下臨城渡滹沱以環其城帝領親軍

繼至鎮帥王鎔懼納質請盟仍獻文繒二十萬以犒戎

士帝許之十月晉人以帝宿兵于趙遂南下大行急攻

河陽留後侯言與都將閻寶力戰固守僅而獲全十一

月以張存敬為上將自甘陵發軍北侵幽薊連拔瀛莫二

郡遂移軍以攻中山定帥王郜以精甲二萬戰于懷德

亭盡殪之郜懼奔于太原遲明大軍集于城下郜季父

處直持印鑰乞降亦以繒帛三十萬為獻帝即以處直

伐郃領其鎮焉是月燕人劉守光赴援中山寨于易水之上繼為康懷英張存敬等所敗斬獲甚衆繇是河朔知懼皆弭伏焉是歲唐左軍中尉劉季述幽昭宗于東宮內立皇子德王裕為帝仍遣其養子希度來言願以唐之神器輸于帝帝時方在河朔聞之遽還于汴大計未決會李振自長安使迴因言于帝曰夫豎刁伊戾之亂所以資霸者之事也今閹豎幽辱天子王不能討無以令諸侯帝悟因請振復使于長安與時宰潛謀反正

天復元年正月乙酉朔唐宰相崔胤潛使人以帝密旨

告于侍衛軍將孫德昭已下令誅左右中尉劉季述王

仲先等即時迎昭宗于東內御樓反正癸巳降制進封

帝為梁王酬反正之功也昭宗之廢也汴之即吏程巖

章昭宗衣下殿帝聞之召巖至汴折其足送于長安杖

殺之是時河中節度使王珂結援于太原帝怒遣大將

張存敬率將涉河繇含山路鼓行而進戊申攻下絳州

壬子晉州刺史張漢瑜舉郡來降帝即以大將侯言權

領晉州何緡權領絳州晉絳平己未大軍至河中存敬
命繚其垣而攻之壬戌蒲人颺素幡以請降庚午帝至
河中以張存敬權領河中軍府事河中平帝乃東還是
月李克用遣牙將張特來聘請尋舊好帝亦遣使報命
三月癸未朔帝歸自河中是月遣大將賀德倫氏叔琮
領大軍以伐太原叔琮等自太行路入魏博都將張文
恭自磁州新口入葛從周以兗鄆之衆自土門路入洛
州刺史張歸厚以本軍自馬嶺入定州刺史王處直以

本軍自飛狐入晉州侯言自陰地入澤州刺史李存璋
棄郡奔歸太原叔琮引軍逼潞州節度使孟遷乞降河
東屯將李審建王周領步軍一萬騎二千詣叔琮歸命
乃進軍趨太原四月乙卯大軍出石會關營于洞渦驛
都將白奉國自井陘入收承天軍張歸厚引兵至遼州
刺史張鄂迎降代叔琮即日與諸軍至陽城下城中雖
時出精騎來戰然危蹙已甚將謀遁矣會叔琮以芻糧
不給遂班師五月癸卯昭宗以帝兼領護國軍節度使

河中尹六月庚申帝發自大梁丁卯視事于河中以素服出郊拜故節度使王重榮墓尋辟其子瓚為節度判官請故相張濬為重榮撰碑帝自中和初歸唐首依重榮至是思其舊德故恩禮若是七月甲寅帝東還梁邸十月戊戌奉密詔赴長安是時朝廷既誅劉季述以韓全誨張弘彥為兩軍中尉袁易簡周敬容為樞密使是時軍國大政專委宰相崔胤每事裁抑宦官官側目胤一日于便殿奏欲盡去之全誨等屬垣聞之嘗于昭宗前

祈哀自訴自是昭宗敕胤每有密奏令進囊封全誨等
乃訪京城美婦人十數以進使求宮中陰事昭宗不悟
胤謀漸泄中官視胤皆裂以重賂甘言誘藩臣以為城
社時因讌聚則相向流涕時胤掌三司貨泉全誨等教
禁兵伺胤出聚而呼噪訴以冬衣減損又于昭宗前訴
之昭宗不得已罷胤知政事胤怒急召帝請以兵入輔
故有是行戊申行次河中同州留後司馬鄴華之幕吏
也舉郡來降辛亥駐軍于渭濱華帥韓建遣使奉牋納

欵又以銀三萬兩助軍是日行次零口癸丑聞長安亂
昭宗為閹官韓全誨等劫遷西幸鳳翔蓋避帝之兵鋒
也翼日遂命旋師夕次于赤水乙卯大軍集于華州城
下韓建惶駭失措即以城降丙辰帝表建權知忠武軍
事促令赴任同華二州平是時唐太子太師盧知猷等
二百六十三人列狀請帝速請迎奉己未遂帥諸軍發
自赤水壬戌次于咸陽偵者云天子昨暮至岐山旦日
宋文通扈蹕入其闔矣是時岐人遣大將符道昭領兵

萬人屯于武功以拒帝帝遣康懷英敗之擄甲士六千
餘衆乙丑次于岐山文通遣使奉書自陳其失請帝入
覲丙辰及岐闢文通渝約閉壁不獲通復次于岐山是
時昭宗累遣使齎朱書御札賜帝遣帝收軍還本道帝
診之曰此必文通全誨之謀也皆不奉詔癸酉飛章奉
辭且移軍北伐乙亥至邠州節度使李繼徽舉城降繼
徽因請去文通所賜李姓復本宗楊氏又請納其帑以
為質帝皆從之仍易其名曰崇本邠州平己丑唐丞相

崔胤京兆尹鄭元規至華州以速迎奉為請許之二年
正月帝復次于武功岐人堅壁不下乃迴軍于河中二
月聞晉軍大舉南下聲言來援鳳翔帝遣朱友寧帥師
會晉州刺史氏叔琮以禦之帝以大軍繼其後三月友
寧叔琮與晉軍戰于晉州之北大敗之生擒克用男廷
鸞帝喜謂左右曰此岐人之所恃也今既如此岐之變
不久矣四月岐人遣符道昭領大軍屯于虢縣康懷英
帥驍騎敗之丁酉唐丞相崔胤自華來謁帝屢述艱運

危急事不可緩又慮羣閹擁昭宗幸蜀且告帝帝為動容肅將辭啓宴于府署帝舉酒肅情激于哀因自持樂版聲曲以侑酒帝甚悅座中以良馬珍玩之物賚既行命諸將繕戎具五月丁巳帝復西征六月丁丑次于虢縣癸未與岐軍大戰自辰至午殺萬餘衆擒其將校數百人乘勝遂逼其壘七月丙午岐軍復出求戰帝軍不利是月遣孔勅帥師取鳳隴成三州皆下之是時岐人相率結寨于諸山以避帝軍帝分兵以討浹旬之內并

平之九月甲戌帝以岐軍諸寨連結稍盛因親統千騎
登高診之時秋空澄霽烟靄四絕忽有紫雲如繖蓋凝
于龍旌之上久之方散觀者咸訝之是時帝以岐人堅
壁不戰且慮師老思欲旋旆以歸河中因密召上將數
人語其事時親從指揮使高季昌獨前出抗言曰天下
雄傑窺此舉者一歲矣今岐人已困願少俟之帝嘉其
言因曰兵法貴以正理以奇勝者詐也乘機集事必由
是乎乃命季昌密募人入岐以紿之尋有騎士馬景堅

願應命且曰是行也必無生理願錄其孥帝悽然止其

行景固請乃許之明日軍出

北夢瑣言云時因朱友倫總騎軍且至將大出兵迺

之諸寨屏匿如無人景因躍馬西走直叩岐圍詐以軍

怨東遁為告且言列寨尚留萬餘人俟夕將遁矣宜速

掩之李茂貞信其言

案李茂貞即宋文通此紀前後互異蓋仍當時軍檄之文未及改從

一畫遽啓二扉悉衆來寇時諸軍以介馬待之中軍一鼓

百營俱進又分遣數騎以據其圍岐人進不能駐其趾

退不能入其壘殺戮蹂踐不知其數茂貞繇是喪胆但

閉壁而已十一月癸卯鄜帥李周彝

新唐書作李茂勲茂勲即周彝也

統兵萬餘人屯于岐之北原與城中舉烽以相應翼日

帝以周彝既離本部鄜時必無守備因命孔勣乘虛襲

下之甲寅鄜州平周彝聞之收軍而遁茂貞既失鄜州

之援愕然有瓦解之懼繇是議還警蹕誅闥寺以自贖

焉三年正月甲寅岐人啓壁唐昭宗降使宣問慰勞兼

傳密旨尋又命翰林學士韓渥趙國夫人寵顏齋詔押

賜帝紫金酒器御衣玉帶丙辰華州留後李存審遣飛

騎來告青州節度使王師範遣牙將張厚輦甲冑弓槊
詐言來獻欲盜據州城事覺已擒之矣是日師範又遣
其將劉鄩盜據兗州丁巳昭宗遣中使押送軍容使韓
全誨已下三千餘人首級以示帝甲子昭宗發離鳳翔
幸左劔寨權駐蹕帝營帝素服待罪昭宗命學士傳宣
免之帝即入見稱罪拜伏者數四既而促召升殿密邇
御座且曰宗廟社稷是卿再造朕與戚屬是卿再生因
解所御玉帶面以賜帝帝亦以玉鞍勒馬金銀器紋錦

御饌酒菓等躬自拜進焉及翠華東行帝匹馬前導十
餘里宣令止之己巳昭宗至長安謁太廟御長樂樓禮
畢謂帝曰朕生入舊京是卿之力也自古救君之危曾
無有如是者況今日再及清廟得親奉觴酒奠于先皇
帝室前卿之德朕知不能報矣即召帝執手聲淚俱發
者久之翼日誅宦官第五可範等五百餘人于內侍省
三月庚辰制以帝為守太尉兼中書令宣武宣義天平
護國等軍節度使諸道兵馬副元帥加食邑三千戶實

封四百戶仍賜回天再造竭忠守正功臣戊戌帝建旆
東還昭宗御延喜樓送之既醉遣內臣賜帝御製楊柳
詞五首三月戊午至大梁時以青州未平命軍士休澣
以俟東征四月丙子巡師于臨朐亟命逼其城與青州
兵戰于城下大敗之是夕淮將王景仁以所部援軍宵
遁帝遣楊師厚追及輔唐殺千人乘勝攻下密州八月
戊辰以伐叛之柄委于楊師厚帝乃東還九月癸卯師
厚率大軍與王師範戰于臨朐青軍大敗殺萬餘人并

擒師範弟師克即時徙寨以逼其城辛亥偏將劉重霸
擒棣州刺史邵播來獻播師範之謀主也帝命斃之戊
午師範舉城請降青州平翼日分命將校畧地于登萊
淄棣等州皆下之繇是東漸至海皆為梁土也帝復命
師範權知青州軍州事師範乃請以錢二十萬貫犒軍
帝許之十月辛巳護駕都指揮使朱友倫因擊鞠墮馬
卒于長安訃至帝大怒以為唐室大臣欲謀叛已致友
倫暴死十一月丁酉青將劉鄩舉兗州來降鄩王師範

之將也師範令竊據兗州久之及聞師範降邠乃歸命
帝以邠善事其主待之甚優尋署為元帥府都押牙權
知鄆州留後天祐元年正月己酉帝發自大梁西赴河
中京師聞之為之震懼是時將議迎駕東幸洛陽慮唐
室大臣異議帝乃密令護駕都指揮使朱友諒矯昭宗
命收宰相崔胤京兆尹鄭元規等殺之又邠岐兵士侵
逼京畿帝因是上表堅請昭宗幸洛昭宗不得已而從
之帝乃率諸道丁匠財力同構洛陽宮不數月而成二

月乙亥昭宗駐蹕于陝帝自河中來覲謁見行營因灑
涕而言曰李茂貞等竊謀禍亂將迫乘輿老臣無狀請
陛下東遷為社稷大計也昭宗命延于寢室見何皇后
面賜酒器及衣物何后謂帝曰此後大家夫婦委身于
全忠矣因歔歔泣下後數日帝開宴于陝之私第請駕臨
幸翼日帝辭歸洛陽昭宗開內宴時有宮人與昭宗附

耳而語韓建躡帝之足帝遽出以為圖已因連上章請

車駕幸洛

十國春秋吳世家三月丁巳唐帝遣間使以
綸詔告難于我及西川河東等令糾率藩鎮

以圖匡復詔有云朕至洛陽則為全忠所幽閉詔敕皆出其手朕意不得復通矣

三月丁未昭

宗制以帝兼判左右神策及六軍諸衛事是時昭宗累遣中使及內夫人傳宣謂帝曰皇后方在草蓐未任就路欲以十月幸洛帝以陝州小藩非萬乘久留之地期以四月內東幸閏月丁酉昭宗發自陝郡壬寅次于穀水是時昭宗左右唯小黃門及打毬供奉內園小兒二百餘人帝猶忌之是日密令醫官許昭遠告變乃設饌于別幄召而盡殺之皆坑于幕下先是選二百餘人形

貌大小一如內園人物之狀至是使一人擒二人縊于坑所即蒙其衣及戎具自飾昭宗初不能辨久而方察自是昭宗左右前後皆梁人矣甲辰車駕至洛都帝與宰相百官導駕入宮乙卯昭宗以帝為宣武宣義護國忠武四鎮節度使時帝請以鄆州授張全義故有此命五月丙寅昭宗宴羣臣曰昨來御樓前一夜亡失敕書賴梁王收得副本不然誤事宰執不得無過矣是日宴次昭宗入內召帝于內殿曲宴帝不測其事不敢奉詔又曰

卿不欲來即令敬翔入來帝密遣翔出乃止己巳奉辭

東歸乙亥至大梁六月帝遣都將朱友裕率師討邠州

節度使楊崇本叛故也癸丑帝西征遂朝于洛陽七月

甲子昭宗宴帝于文思鞠塲乙丑帝發東都壬申至河

中八月壬寅昭宗遇弒于大內遺制以輝王祝為嗣乙

巳帝自河中引軍而西癸丑次于永壽邠軍不出九月

辛未班師十月癸巳至洛陽詣西內臨于梓宮前祇見

于嗣君辛丑制以

案此下有闕文

帝至自西征十一月辛酉光

州遣使來求援時光州歸款于帝尋為淮人所攻故來
乞師戊寅帝南征度淮次于霍邱大掠廬壽之境淮人
乃棄光州而去二年正月庚申進攻壽州壽人堅壁不
出丁亥帝自霍邱班師二月辛卯帝至自南征甲午青
州節度使王師範至大梁帝待以賓禮尋表授河陽節
度使七月辛酉天子賜帝迎鑾紀功碑樹于洛陽庚午
遣大將軍楊師厚率前軍討趙匡凝于襄州辛未帝南
征表趙匡凝罪狀削奪官爵八月楊師厚進收唐鄧復

郢隨均房等七州帝駐軍漢江北自循江千經度濟師之所九月甲子師厚于陰谷江口造梁以濟師趙匡凝率兵二萬振于江濱師厚麾兵進擊襄人大敗殺萬餘衆乙丑趙匡凝焚其舟率親軍載輕舸沿漢而遁丙寅帝濟江至中流舟壞將沒者數四比及岸舟沉是日入襄城帝因周視府署其帑藏悉空惟于西廡下有一亭牕戶儼然扃鎖甚密遂令破鎖啓扉中有一大匱絨繡甚至又令破其匱內有金銀數百錠帝因歎曰亂兵既

入公私財貨固無子遺矣此帑當有陰物主之不令常人所得俟我以有之耶遂以百餘錠賜楊師厚襲荊州留後趙匡明棄城上峽奔蜀荆襄二州平帝以都將賀瓌權領荊州楊師厚權領襄州即表其事十月丙戌朔天子以帝為諸道兵馬元帥辛卯帝自襄州引軍由光州路趨淮南將發敬翔切諫請班師以全軍勢帝不聽壬辰次于棗陽遇大雨頗阻師行之勢軍至壽春壽春人堅壁清野以待帝帝乃還舍于正陽十一月丙辰大

軍北濟

十國春秋柴再用抄其後軍斬首三千級護輜重萬計

帝至汝陰深悔淮

南之行躁煩尤甚

師友雜誌朱全忠嘗與僚佐及遊客坐于大柳之下全忠獨言曰此樹宜

為車轂衆莫應有遊客數人起應曰宜為車轂全忠勃然厲聲曰書生輩好順口玩人皆比類也車須用夾轂柳木豈可為之顧左右曰尚何待左右數十人皆言為車轂者悉撲殺之

丁卯帝至自南征

辛巳天子命帝為相國總百揆以宣武宣義天平護國天

雄武順佑國河陽義武昭義保義武昭武定泰寧平盧

匡國武寧忠義荆南等二十一道為魏國

案舊唐書尚有忠武鎮國

二道此闕載

進封帝為魏王入朝不趨劔履上殿贊拜不名

兼備九錫之命癸未唐中書門下奏中書印已送相國
中書公事權用中書省印甲申中書門下奏天下州縣
名與相國魏王家諱同者請易之十二月乙酉朔帝讓
相國魏王九錫之命丙戌京百司各差官齎本司須知
孔目竝印赴魏國送納甲午天子以帝堅讓九錫之命
乃命宰相柳燦來使且述揖讓之意焉丁酉帝又讓九
錫之命詔畧曰但以鴻名難掩懿實須彰宜且徇于奏
陳未便行于典冊又改諸道兵馬元帥為天下兵馬元

帥是時帝以唐朝百官服飾多闕乃製造逐色衣服請朝廷等第賜之其所給俸錢仍請自來年正月全支三年正月幽滄稱兵將寇于魏魏人來乞師且以牙軍驕悍謀欲誅之遣親吏臧延範密告于帝帝陰許之乙丑北征先是帝之愛女適羅氏是月卒于鄴城因以兵伐數千事實于橐中遣客將馬嗣勲領長直軍千人雜以工匠丁夫肩其橐而入于魏聲言為帝女設祭魏人信而不疑庚午夜嗣勲率其衆與羅紹威親軍數百人同

攻牙軍遲明盡殺之死者七千餘人洎于嬰孺亦無留
者是月帝次于內黃聞之馳騎至魏時魏之大軍方與
帝軍同伐滄州聞牙軍之死即時奔還帝之軍追及歷
亭殺賊幾千餘衆乃擁大將史仁遇保于高唐帝遣兵
圍之是月天子詔河南尹張全義部署修制相國魏王
法物三月甲寅天子命帝總判鹽鐵度支戶部等三司
事帝再上章切讓之乃止四月癸未攻下高唐軍民無
少長皆殺之生擒逆首史仁遇以獻帝命支解之未幾

又攻下澶博貝衛等州皆為魏軍殘黨所據也是時晉人圍邢州刺史牛存節堅壁固守帝遣符道昭帥師救之晉人乃遁去五月帝畧地于洺州既而復入于魏七月己未自魏班師是日收復相州自是魏境悉平壬申帝歸自魏八月甲辰以滄州未平復命北征九月丁卯營于長蘆一夕帝夢白龍附于兩肩左右瞻顧可畏恍然驚悟十月辛巳邠州楊崇本以鳳翔邠寧涇廊秦隴之衆合五六萬來寇屯于美原列十五寨其勢甚盛帝

命同州節度使劉知俊都將康懷英帥師禦之知俊等大破邠寇殺二萬餘衆奪馬三千餘匹擒其列校百餘人楊崇本胡章僅以身免十一月庚戌懷英乘勝進軍遂收鄜州十二月乙丑帝以文武常叅官每月一五九

日赴朝奏請備廊食詔從之遂自長蘆班師

案以上疑有闕文據

舊唐書哀帝紀戊辰李克用與幽州之衆同攻潞州全忠守將丁會以澤潞降太原克用以其子嗣昭為留後甲戌全忠燒長蘆營旋軍聞潞州陷故也以寨內糗糧山積帝命焚之滄帥

劉守文以城中絕食因致書于帝乞留餘糧以救饑民

帝為留十餘困以與之

容齋續筆滄州還師悉焚諸營資糧在冊中者鑒而沉之守人

遺全忠書曰城中數萬口不食數月矣與其焚之為堙沈之為泥願乞其所餘以救之全忠為之留數困滄人

濟賴以

舊五代史卷二

舊五代史卷二攷證

梁太祖紀二磁州刺史袁奉湏○磁原本訛惠今據新
唐書及通鑑改正

是時襄州節度趙匡凝○趙匡凝沿宋諱作趙凝今據
舊唐書及歐陽史增匡字

隨州刺史趙匡琳○趙匡琳沿宋諱作趙璘今據新唐
書增匡字

先屯于內黃○案舊唐書及通鑑俱以屯內黃為三月事

由是潞州復為晉人所有○案澤潞懷三州之下新唐書及通鑑俱作八月歐陽史從是書作七月

洺州復平○案洺州之平通鑑作九月舊唐書及歐陽史俱作八月

連拔瀛莫二州○案新唐書昭宗紀九月甲寅朱全忠陷瀛州十月辛酉陷莫州通鑑與新唐書同攷舊唐書俱作九月事是書俱作十一月

天復元年正月乙酉朔○案乙酉朔通鑑與是書同舊

唐書作甲申攷昭宗本紀癸未夜孫德昭等以兵攻
劉季述王仲先通鑑作德昭等謀以除夜伏兵俟之
以癸未為除夜則正朔斷為甲申也作乙酉朔似誤
癸巳降制進封帝為梁王○案全忠進封新舊唐書皆
作二月與是書作正月異

定州刺史王處直以本軍自飛狐入○案王處直三字
原本闕今據通鑑增入

會氏叔琮以芻糧不給遂班師○案旋師之期歐陽作

三月是書唐紀作五月又與此紀作四月異

罷肩知政事○案崔肩罷知政事新舊唐書皆作十一月甲戌與是書異

己丑唐丞相崔肩京兆尹鄭元規至華州○案舊唐書作十二月己卯崔肩至三原若通鑑作癸未俱與是書作己丑異

癸未與岐軍大戰○案岐軍之敗新舊唐書皆繫五月與是書作六月異

願錄其孥○案錄訛戮今參攷通鑑及北夢瑣言據文改正

甲寅鄜州平周彝聞之收軍而遁○案鄜州平新舊唐書皆繫十二月與是書繫十一月異

華州留後李存審○案李存審三字疑有舛誤攷王師範傳作崔胤在華州

是日師範又遣其將劉鄩盜據兖州○案劉鄩陷兖州新舊唐書俱作丙午與是書作丙辰異

昭宗御延喜樓送之○喜原本訛熹今據通鑑改正
戊午師範舉城請降○案師範之降舊唐書作十一月
丁酉新唐書與是書同


朱友倫因擊鞠墮馬卒於長安○友倫九國志趙廷隱
傳作友亮攷歐陽史及通鑑並作友倫九國志訛
護駕都指揮使朱友諒○友諒歐陽史梁紀作友謙誤
攷歐陽史家人傳亦作友諒與是書同

表趙匡凝罪狀削奪官爵○案削奪趙匡凝官爵舊唐

書作八月丁未與是書作七月辛未異

武昭武定泰寧平盧匡國○案武昭原本脫武字匡國
沿宋諱作章國今據歐陽史增改





總校官進士臣程嘉謨

校對官檢討臣王福清

謄錄監生臣任遇春

欽定四庫全書叢要

史部

舊五代史卷八

三至

詳校官內閣侍讀孫球



欽定四庫全書薈要卷五千四百四

舊五代史卷三

宋門下侍郎參知政事監修國史薛居正等撰

梁書第三

太祖紀三

開平元年正月丁亥帝迴自長蘆次於魏州節度使羅紹威以帝迴軍慮有不測之患由是供億甚至因密以天人之望切陳之帝雖拒而不納然心德之壬寅帝至

自長蘆是日有慶雲覆於府署之上甲辰天子遣御史大夫薛貽矩來傳禪代之意貽矩謁帝陳北面之禮帝揖之升階貽矩曰陛下功德及人三靈所卜已定皇帝方議裁詔行舜禹之事臣安敢違既而拜伏於砌下帝側躬以避之二月戊申帝之家廟棟間有五色芝生焉狀若芙蓉紫烟蒙護數日不散又是月家廟第一室神主上有五色衣自然而生識者知梁運之興矣唐乾符中木星入南斗數夕不退諸道都統晉國公王鐸觀之

問諸知星者吉凶安在咸曰金火土犯斗即為灾惟木
當為福耳或亦然之時有術士邊岡者洞曉天文博通
陰陽歷數之妙窮天下之奇秘有先見之明雖京房管
輅不能過也鐸召而質之岡曰惟木為福神當以帝王
占之然則非福於今必當有驗於後未敢言之請他日
證其所驗一日又密召岡因堅請語其詳至於三四岡
辭不獲鐸乃屏去左右岡曰木星入斗帝王之兆也木
在斗中朱字也以此觀之將來當有朱氏為君者也天

戒之矣且木之數三其禎也應在三紀之內乎鐸聞之不復有言天后朝有識辭云首尾三鱗六十年兩角犢子自狂顛龍蛇相鬪血成川當時好事者解云兩角犢子牛也必有牛姓干唐祚故周子諒彈牛仙客李德裕謗牛僧儒皆以應圖讖為辭然朱字牛下安八八即角之象也故朱滔朱泚構喪亂之禍冀無妄之福豈知應之帝也四月唐帝御札勅宰臣張文蔚等備法駕奉迎梁朝宋州刺史王臯進赤烏一雙又宰臣張文蔚正押

傳國寶玉冊金寶及文武羣官諸司儀伏法物及金吾左右二軍離鄭州丙辰達上源驛是日慶雲見令曰王者創業興邦立名傳世必難知而示訓從易避以便人

案此下有闕文

或稽其符命應彼開基之義垂諸象德之言爰

攷簡書求於往代周王昌發之號漢帝詢衍之文或從一德以徽稱或為二名而更易先王令典布在縑緗寡人本名兼於二字且異帝王之號仍兼避易之難郡縣官多須改換况宗廟不遷之業憲章百世之規事叶

典儀豈憚革易寡人今改名晃是以天意雅符於明德
日光顯契於瑞文昭融萬邦理斯在是庶順玄穹之意
永臻康濟之期宜令有司分告天地宗廟其舊名中外
章疏不得更有迴避時將受禪下教以本名二字異帝
王之稱故改名已未賜文武百官一百六十人本色衣
一副戊辰即位制曰王者受命於天先宅四海祇事上
帝寵綏下民革故鼎新諒歷數而先定創業垂統知圖
錄以無差神器所歸祥符合應是以三正互用五運相

生前朝道消中原政散瞻烏莫定失鹿難追朕經緯風
雷沐浴霜露四征七伐垂三十年糾合齊盟翼戴唐室
隨山刊木罔憚胼胝投袂揮戈不遑寢處泊玄穹之所
贊知廣運之不興莫諧輔漢之謀徒罄事殷之禮唐主
知英革已竭算祀有終釋龜鼎以如遺推劒紱而相授
朕懼德弗嗣執謙允恭避駿命於南河眷清風於潁水
而乃列嶽羣后盈廷庶官東西南北之人班白緇黃之
衆謂朕功蓋上下澤被幽深宜應天以順時俾化家而

為國拒彼億兆至於再三且曰七政已齊萬幾難曠勉
遵令典爰正鴻名告天地神祇建宗廟社稷顧惟涼德
曷副樂推慄若履冰慄如馭朽金行啟祚王歷建元方
宏經始之規宜布惟新之令可改唐天祐四年為開平
元年國號大梁書載虞賓斯為令範詩稱周客蓋有明
文是用先封以禮後嗣宜以曹州濟陰之邑奉唐主封
為濟陰王凡曰軌儀並遵故實姬庭多士比是股臣楚
國羣材終為晉用歷觀前載自有通規但遵故事之文

勿替在公之効應是唐朝中外文武舊臣見任前資官
爵一切仍舊凡百有位無易厥章陳力濟時盡瘁事我
古者興王之地受命之邦集大勲有異庶方霑慶澤所
宜加等故豐沛著啟祚之美穰鄧有建都之榮用壯鴻
基且旌故里爰遵令典先示殊恩宜升汴州為開封府
建名東都其東都改為西都仍廢京兆府為雍州佑國
軍節度使五代會要四月改京兆府為大安府長安縣
為大安縣萬年縣為大年縣仍置佑國軍節
度使額始命韓建是日大酺賞賜有差通鑑甲辰唐昭
宣帝降御札禪

位于梁以攝中書令張文蔚為冊禮使禮部尚書蘇循
副之攝侍中楊涉為押傳國寶使翰林院學士張策副
之御史大夫薛昭矩為押金寶使尚書左丞趙光逢副
之帥百官備法駕詣大梁甲子張文蔚楊涉乘輅自土
源驛至從冊寶諸司各備儀衛鹵簿前導百官從其後
至金祥殿前陳之王被袞冕即皇帝位張文蔚蘇循奉
冊升殿進讀揚涉張策薛昭矩趙光逢以次奉寶升殿
讀已降帥百官舞蹈稱賀帝遂與文蔚等宴於元德殿
帝舉酒曰朕輔政未久此皆諸公推戴之力文蔚等慙
懼俯伏不能對獨蘇循薛昭矩及刑部尚書張祚盛稱
帝功德宜

應天順人

宋州刺史王臯進兩岐麥陳州袁象先進白

兔一付史館編錄兼示百官詔在京司及諸軍州縣印
一例鑄換其篆文則各如舊辛未武安軍節度使馬殷

進封楚王以太府卿敬翔知崇政院翔與帷幄之謀故
首擢焉追尊四代廟號高祖妣州府君上諡曰宣元皇
帝廟號肅祖太廟第一室陵號興極陵祖妣高平縣君
范氏追諡宣僖皇后皇曾祖宣惠王上諡曰光獻皇帝
廟號敬祖第二室陵號永安祖妣秦國夫人楊氏追諡
光孝皇后皇祖武元王上諡曰昭武皇帝廟號憲祖第
三室陵號光天祖妣吳國夫人劉氏追諡昭懿皇后皇
考文明王上諡曰文穆皇帝廟號烈祖第四室陵號咸

寧皇妣晉國太夫人王氏追謚文惠皇后以宣武節度副使皇子友文為開封尹判建昌院事友文本康氏子也帝養以為子是月制宮殿門及都門名額正殿為宗元殿東殿為元德殿內殿為金祥殿萬歲堂為萬歲殿門如殿名帝自謂以金德王又以福建上獻鸚鵡諸州相繼上白鳥白兔白蓮之合蒂者以為金行應運之兆故名殿曰金祥以大內正門為元化門皇城南門為建國門滴漏門為啟運門下馬門為升龍門元德殿前

門為崇明門正殿東門為金烏門西門為玉兔門正衙
東門為崇禮門東偏門為銀臺門宴堂門為德陽門天
王門為賓天門皇牆東門為寬仁門浚儀門為厚載門
皇牆西門為神獸門望京門為金鳳門宋門為觀化門
尉氏門為高明門鄭門為開明門梁門為乾象門酸棗門為
興和門封邱門為含耀門曹門為建陽門升開封浚儀為
赤縣尉氏封丘雍邱陳留為畿縣

五代會要四月改左
右長真為左右龍虎

軍左右內衙為左右羽林軍左右堅銳夾馬突將為
左右神武軍左右親隨軍將馬軍為左右龍驤軍

五

月以唐朝宰臣張文蔚楊涉並為門下侍郎平章事以
御史大夫薛昭矩為中書侍郎平章事帝初受禪求理
尤切委宰臣搜訪賢良或有在下位抱負器業久不得
伸者特加擢用有明政理得失之道規救時病者可陳
章疏當親鑒擇利害施行然後賞以爵秩有晦跡邱園
不求聞達者令彼長吏備禮邀致冀無遺逸之恨進封
河南尹兼河陽節度使張全義為魏王兩浙節度使錢
鏐進封吳越王辛巳有司奏以降誕之日為大明節休

假前後各一日壬午保義軍節度使朱友謙進百官衣
二百副乙酉立皇兄全昱為廣王皇子友文為博王友
珪為郢王友璋為福王友雍為賀王友徽為建王辛卯
以東都舊第為建昌宮改判建昌宮事為建昌宮使初
帝創業之時以四鎮兵馬倉庫籍繁因總置建昌院以
領之至是改為宮蓋重其事也甲午詔天下管屬及州
縣官名犯廟諱者各宜改換城門郎改為門局郎茂州
改為汶州桂州慕化縣改為歸化縣潘州茂名縣改為

越裳縣

魏泰東軒筆錄京師呼城外為州東州西州南州北焉而韋城相城胙城等縣但呼韋縣相縣

胙縣蓋沿梁時避諱之舊也

詔樞密院宜改為崇政院以知院事敬

翔為院使改文思院為乾文院同和院改為儀鸞院

五代會要五月改御

食使為司膳使小馬坊使為天驥使

以西都水北宅為大昌宮廢雍州太清宮改

西都太微宮亳州太清宮皆為觀諸州紫極宮皆為老君廟泉

州僧智宣自西域回進辟支佛骨及梵夾經律丙申御元德殿

宴犒諸軍使劉捍符道昭已下賜物有差是月青州許州定州

三鎮節度使請開內宴各賜方物以青州節度使韓建守司徒平

章事帝以建有文武材且詳於稼穡利害軍旅之事籌
度經費欲盡詢焉恩澤特異於時罕有比者隨拜為上
相賜賚甚厚宿州刺史王儒進白兔一濮州刺史圖嘉
禾瑞麥以進廣州進奇寶名樂品類甚多河南尹張全
義進開平元年已前羨餘錢十萬貫紬六千匹綿三十
萬兩仍請每年上供定額每歲貢絹三萬匹以為常式
荆南高季昌進瑞橘數十顆質狀百味倍勝常貢且橘
當冬熟今方仲夏時人咸異其事因稱為瑞六月辛乾

元院宴召宰臣學士及諸道入貢陪臣已亥帝御崇元殿內出追尊四廟上謚號玉冊寶共八副宰臣文武百官儀仗鼓吹導引至太廟行事癸卯司天監奏日辰內有戊字請改為武從之癸亥詔以前朝官僚譴逐南荒積年未經昭雪其間有懷抱材器為時所嫉者深負冤抑仍令錄其名姓盡復官資兼告諭諸道令津致赴闕如已亡歿並許歸葬以明恩蕩以西都徽安門北路逼近大內宮垣兼非民便令移自榆林直趣端門之南改

耀州報恩禪院為興國寺馬殷奏破淮寇靜海軍節度

使曲裕卒七月丙申以靜海軍行營司馬權知留後曲

顗起復為安南都護充節度使

五代會要七月勅云建國遷都俾新其制况山

河之險表裏為防令二京俱在關東以內仍以潼關隸陝州復置河潼軍使命號州刺史兼領之其月勅改武

牢關為軍仍置虎牢關軍使

己亥追尊皇妣為皇太后八月以潞州

軍前屯師旅壁壘未收乃別議戎帥於是以亳州刺史

李思安充潞州行營都統勅朝廷之儀封冊為重用報

勲烈以隆恩榮固合親臨式光典禮舊章久缺自我復

行今後每封冊大臣宜令有司備臨軒之禮

五代會要八月敕云

諸道所有軍事申奏令直至右銀臺門委各省使畫時引進尋常公事依前四方館收接

甲子平明

前老人星見於南極壬申密州進嘉禾又有合歡榆樹
並圖形以獻是月隰州奏大寧縣至固鎮上下二百里
今月八日黃河清至十日如故九月辛丑西京大內放
出兩宮內人及前朝宮人任其所適勅以近年文武官
諸道奉使皆於所在分外停住踰年涉歲未聞歸闕非
惟勞費州郡抑且侮慢國經臣節既虧憲章安在自今

後兩浙福建廣州安南邕容等道使到發許住一月湖
南洪鄂黔桂許住二十日荆襄同雍鎮定青滄許住十
日其餘側近不過三五日凡往來道路據遠近里數日
行兩驛如遇疾患及江河阻隔委所在長吏具事由奏
聞如或有違當行朝典命御史點檢糾察以儆慢官魏
博羅紹威二男廷望廷矩年在幼稚皆有材器帝以其
藩屏勲臣之胄宜受非次之用皆擢為郎恩命既行之
後二子亦就班列紹威乃上章以齒幼未任公事乞免

主印宿直從之封鎮東軍神祠為崇福侯浙西奏道門
威儀鄭章道士夏隱言焚修精志妙達希夷推諸輩流
實有道業鄭章宜賜號貞一大師仍名玄章隱言賜紫

衣

五代會要九月置左右天興左右廣勝軍仍以親王為軍使

十月帝以用軍未暇

西幸文武百官等久居東京漸及疑訝令就便各許歸
安只留韓建薛昭矩翰林學士張策韋郊杜曉中書舍
人封舜卿張家弁左右御史司天監宗正寺兼要當諸
司節級外其宰臣張文蔚已下文武百官並先於西京

祇候庚午大明節內外臣僚各以奇貨良馬上壽故事
內殿開宴召釋道二教對御談論宣旨罷之命閣門使
以香合賜宰臣佛寺行香駕幸繁臺講武癸酉御史司
憲薛廷珪奏請文武百官仍舊朝參先是帝欲親征河
東命朝臣先赴維都至是緩其期乃允所奏宰臣請每
月初入閣望日延英聽政永為常式山南東道節度使
楊師厚進納趙匡凝東第書籍先是收復襄漢帝閱其圖
書至是命師厚進焉廣州進獻助軍錢二十萬又進龍

腦腰帶珍珠枕玳瑁香藥等十一月壬寅帝以征討未
罷調補為先遂命盡赦逃亡背役髡黥之人各許歸鄉
里廣州進龍形通犀腰帶金托裏含稜玳瑁器百餘副
香藥珍巧甚多廣南管内獲白鹿並圖形來獻耳有兩
缺按符瑞圖鹿壽千歲變白耳一缺今驗此鹿耳有二
缺其獸與色皆應金行實表嘉瑞十二月辛亥詔曰潞
寇未平王師在野攻戰之勢難緩於寇圍飛輓之勤實
勞於人力永言輟耒深用軫懷宜令長吏丁寧布告期

以兵罷之日給復賦租於是人戶聞之皆忘其倦詔故
荆南節度使守中書令上谷王周訥贈太師故武昌軍
節度使兼中書令西平王杜洪贈太傅先是鄂渚再為
淮夷所侵攻圍甚急杜洪以兵食將盡繼來乞師帝料
其隔越大江難以赴援兼以荊州據上游多戰艦去江
夏甚邇因命周訥舉舟師沿沅以救之訥於是引兵東
下纔及鄂界遇朗州背盟作亂乘江陵之虛縱兵襲破
之俘掠且盡既而訥士卒知之皆顧其家咸無鬪志遂

為淮寇所敗將卒潰散訥忿恚自投於江訥之本姓犯
文穆皇帝廟諱至是因追贈以其系出周文故賜姓周
氏及訥兵敗之後武昌以重圍經年糧盡力困救援不
至訥為淮寇所陷載洪以送淮師遂殺之此二鎮皆以
忠貞歿於王事帝每言諸藩屏翰經綸之業必首痛訥
洪之薨至是追贈之深加軫悼各以其子孫宗屬錄用
焉棣州蒲臺縣百姓王知嚴妹以亂離并失怙恃因舉
哀追感自截兩指以祭父母帝以遺體之重不合毀傷

言念村閭何知禮教自今後所在郡縣如有截指割股
不用奏聞是年諸道多奏軍人百姓割股青齊河朔尤
多帝曰此若因心亦足為孝但苟免徭役自殘肌膚欲
以庇身何能療疾並宜止絕

五代會要十二月於輝州
碭山縣置崇德軍太祖掄

社在碭山置使以領之
始命朱彥讓為軍使

舊五代史卷三

舊五代史卷三攷證

梁太祖紀三節度使羅紹威○紹威原本作昭威今據
歐陽史改

判建昌院事○案原本脫昌字今增

以青州節度使韓建守司徒平章事○青原本訛清今
改正

癸卯司天監奏日辰內有戊字請改為武從之○案容
齋三筆以為戊類成字故司天諡之不知戊字乃避

梁祖曾祖茂林諱非以其類成字也雲谷雜記嘗辨正之今崇福侯廟碑立於開平二年上作武寅足證當時避諱之體

是日隰州奏大寧縣至固鎮上下二百里○案是書前後多作李固鎮疑原本有脫字攷通鑑亦間作固鎮蓋當時奏牘省文也今仍之

欽定四庫全書薈要卷五千四百五

舊五代史卷四

宋門下侍郎參知政事監修國史薛居正等撰

梁書第四

太祖紀四

開平二年正月癸酉帝御金祥殿受宰臣文武百官及諸藩屏陪臣稱賀諸道貢舉一百五十七人見于崇元門封從子友寧為安王友倫為密王幽州劉守文進海

東鴈鵲蕃馬種屬方物自冬去少雪春深農事方興久
無時雨兼慮有災疾帝深軫下民二月命庶官遍祀于
羣望掩瘞暴露令近鎮案古法以禳祈旬日乃雨

是月
試濟

陰王帝以上黨未収因議撫巡便住西都赴郊禋之禮乃

下令曉告中外取三月一日離東京以宰臣韓建權判

建昌宮事

五代會要十月以尚書兵部
侍郎李皎為建昌宮副使

兵部侍郎姚洎

為鹵簿使開封尹博王友文為東都畱守辛未契丹主
按巴堅遣使貢良馬三月壬申帝親統六軍巡幸澤潞

是日寅時車駕西幸宰臣并要切司局皆扈從晚次中牟下詔以去年六月後昭義行營陣歿都將吏卒死于王事追念忠赤乃錄其名氏各下本軍令給養妻孥三年內官給糧賜丁丑幸澤州辛巳以同州節度使劉知俊為潞州行營招討使壬午宴扈駕羣臣并勞知俊賜以金帶戰袍寶劍茶藥甲申登東北隅逍遙樓蒐閱騎乘旌甲滿野丙申招討使劉知俊上章請車駕還東京蓋小郡湫隘非久駐蹕之所達覽帝俞其請以鴻臚卿

李從唐室宗屬封萊國公為二王後有司奏萊國公李
從合畱三廟于西都選地位建立廟宇以備四仲祀祭
命度支供給以遵彝典四月以吏部侍郎于兢為中書
侍郎平章事以翰林奉旨學士張策為刑部侍郎平章
事時帝在澤州拜二相于行在丙午車駕離澤州丁未
駐蹕于懷州宴宰臣文武百官辛亥至鄭州壬子幸東
京丙寅車駕幸繁臺觀稼鄆陵居人程震以兩岐麥穗
并畫圖來進甲寅淮寇侵軼潭岳邊境欲援朗州以戰

艦百餘艘揚帆西上泊鼎口湖南馬殷遣水軍都將黃
瑀率樓船遮擊之賊衆沿流宵遁追至鹿角鎮詔以戶
部尚書致仕裴廸復為右僕射廸敏事慎言達吏治明
籌算帝初建節旄于夷門廸一謁見如故知乃辟為從
事自是之後歷三十年委四鎮租賦兵籍帑廩官吏獄
訟賞罰經費運漕事無巨細皆得專之帝每出師即知
軍州事逮于二紀不出梁之閭閻甚有裨贊之道禪代
之歲命為太常卿屬年已耆耄視聽昏塞不任朝謁遂

請老許之朞月復起師長庶官焉五月丁丑王師圍潞
州將及二年李進通危在旦夕不俟攻擊當自降太原
李存勗以厚幣誘結北蕃諸部竝其境內丁壯悉驅南
征決戰以救上黨之急部落帳族馳馬勵兵數路齊進
于銅鞮樹寨旗壘相望王師敗于潞州己丑令下諸州
去年有蝗蟲下子處蓋前冬無雪今春亢陽致為災沴
實傷墾畝必慮今秋重困稼穡自知多在荒陂榛蕪之
內所在長吏各須分配地界精加翦撲以絕根本壬辰

夜火星犯月太史奏災合在荆楚乃令設武備寬刑罰
恤人禁暴以襁之軍前行營都將康懷英孫海金已下
主將四十三人于右銀臺門進狀待罪帝以去年發軍
之日不利有違兵法並釋放兼各賜分物酒食勞問封
義昌軍節度使劉守文加中書令封大彭王盧龍軍節
度使劉守光封河間郡王許州節度使馮行襲封長樂
王是月癸未淮賊寇荊州石首縣襄陽舉舟師沿滬港
襲敗之六月辛亥以亢陽慮時政之闕乃詔曰邇者下

民喪禮法吏舞文銓衡既失于選求州鎮又無其舉刺
風俗未厚獄訟實繁職此之由上遭天譴至是決遣囚
徒及戒勵中外丙寅月犯角宿帝以其分野在兗州乃
令長吏治戎事設武備省獄訟恤疲病祈福禳災以順
天戒丙辰邠岐來寇雍西編戶困于逃避且芟害禾稼
結營自固踰月同州劉知俊領所部兵擊退襲至幕谷
大破之俘斬千計收其器甲宋文通僅以身免詔曰敦
尚儉素抑有前聞斥去浮華期臻至理如聞近日貢奉

競務奢淫或奇巧蕩心或雕鐫溢目徒殫資用有費工
庸此後應諸道進獻不得以金寶裝飾戎甲劍戟至于
鞍勒不用塗金及雕刻龍鳳如有此色所司不得引進
邕州奏鑊鄣山僧法通道璘有道行各賜紫衣是月壬
戌岳州為淮賊所據帝以此郡五嶺三湘水陸會合之
地委輸商賈靡不由斯遂令荆湘湖南北舉舟師同力
致討王師既集淮夷毀壁焚郭而遁秋七月甲戌大霖
雨陂澤泛溢頗傷稼穡帝幸右天武軍河亭觀水幸高

僧臺閱禁衛六軍詔曰車服以庸古之制也貴賤無別

罪莫大焉應內外將相許以銀飾鞍勒其刺史都將內

諸司使以降祇取用銅翼定尊卑永為條制仍令執法

官糾察之

五代會要載七月敕曰祭祀之儀有國大事如聞官吏慢于恪恭牲具禮容有異精審宜

令御史臺疏其條件奏聞

癸巳以禪代已來思求賢哲乃下令搜訪

牢籠之期以好爵待以優榮各隨其材咸使登用宜令

所在長吏切加搜訪每得其人則疏姓名以聞如在下

位不能自振者有司薦導之如任使後顯立功勞別加

遷陟勅禁屠宰兩月甲午以高明門外繁臺為講武臺
是臺西漢梁孝王之時嘗按歌閱樂于此當時因名曰
吹臺其後有繁氏居于其側里人乃以姓呼之時代綿
寢雖官吏亦從俗焉帝每登眺蒐乘訓戎宰臣以是事
奏而名之八月辛亥勅應有暴露骸骨各委差人埋瘞
兩浙錢鏐奏請重鑄換諸州新印詔禁戢諸軍節級兵
士及供奉官受旨殿直以下各脩禮敬甲寅太史奏壽
星見于南方兩浙錢鏐奏改管內紫極宮為真聖觀改

臨安縣廣義鄉為衣錦鄉

十國春秋吳越世家八月梁敕封唐山縣為吳昌縣唐興

縣為天台縣又敕升杭越等州為大都督府復改新城縣曰新登長城縣曰長興樂成曰樂清避梁諱也甲

子夜東方有大流星光明燭地有聲如裂帛唐州上言

白龍見圖形以進九月丙子太原軍出陰地關南牧寇

掠郡縣晉絳有備帝慮諸將翫寇乃下詔親議巡幸命

有司備行丁丑翠華西狩宰臣翰林學士崇政院使金

吾仗及諸司要切官皆扈從餘文武百官竝在東京壬

午遼雒陽帝御文思殿受朝叅許汝孟懷牧守來朝澤

州刺史劉重霸面陳破敵之策癸未西幸宿新安丙戌
至陝州駐蒲雍同華牧守皆進鎧甲騎馬戈戟食味方
物幽州都將康君紹等十人自蕃賊寨內來投又幽州
騎將高彥章八十人騎先在并州乃于晉州軍前來降
至是到行在皆賜分物衣服放歸本道以示懷服丁亥
至陳州賜宴扈從官戊子延州賊軍寇上平關又太原
軍攻平陽烽火羽書晝夜繼至乙丑六軍統軍牛存節
黃文靖各領所部將士赴行在甲午太原步騎數萬攻

逼晉絳踰旬不克知大軍至乃自焚其寨至夕而遁福
州貢玳瑁琉璃犀象器并珍玩香藥奇品海味色類良
多價累千萬十月己亥上在陝兩浙節度使奏于常州
東州鎮殺淮賊萬餘人獲戰船一百二隻以行營左廂
步軍指揮使賀瓌為左龍虎統軍以左天武軍夾馬指
揮使尹皓為輝州刺史以右天武都頭韓瑋為神捷指
揮使左天武第三都頭胡賞為右神捷指揮使仍賜帛
有差以解晉州圍之功也以尹皓部下五百人為神捷

軍乙巳御內殿宴宰臣扈從官共四十五人丙午御毬
場殿宣夾馬都指揮使尹皓韓瑋以下將士五百人賜
酒食庚戌至西都御文明殿辛亥宰臣百寮起居于殿
前遂宣赴內宴賜方物有差丁巳至東都已未大明節
諸道節度刺史各進獻鞍馬銀器綾帛以祝壽宰臣百
官設齋相國寺壬戌御宣和殿宴宰臣文武百官十一
月辛未御宣和殿宴宰臣文武百官以大駕還京故也
庚辰御宣和殿宴宰臣文武百官出開明門登高僧臺

開兵諸道節度使刺史各進賀冬田器鞍馬綾羅等戊
子賜文武百官帛乙未又宴宰臣文武百官于宣和殿
通鑑癸巳中書侍郎同平章事張策以刑
部尚書致仕以左僕射楊涉同平章事十二月立二

王三恪南郊禮儀使狀伏以詩稱有客書載虞賓實因
禪代之初必行興繼之命俾之助祭式表推恩兼垂恪
敬之文別示優崇之典徵于歷代襲用舊章謹按唐朝
以後魏元氏子孫韓國公為三恪以周宇文氏子孫為
介國公隋朝楊氏子孫為鄴國公為二王後今伏以國

家受禪封唐朝子孫李從為萊國公今參詳合以介國

公為三恪鄴國公萊國公為二王後

五代會要十二月改左右天武為龍

虎軍左右龍虎為天武軍左右天威為羽林軍左右羽林為天威軍左右英武為神武軍左右神武為英武軍前朝置龍虎六軍謂之衛士至是以天武神武英武等六軍易其軍號而任勲舊焉

癸丑獵畋于

含耀門外

開平三年正月戊辰朔帝御金祥殿受宰臣翰林學士稱賀文武百官拜表于東上閣門己巳奉遷太廟四室神主赴西京太常儀仗鼓吹導引齋車文武百官奉辭

于開明門外甲戌發東都百官扈從次中牟縣乙亥次
鄭州丙子次汜水縣河南尹張宗奭河陽節度使張歸
霸並來朝戊寅次偃師縣己卯備法駕六軍儀仗入西
都是日御文明殿受朝賀詔曰近年以來風俗未泰兵
革且繁正月燃燈廢停已久今屬創開鴻業初建洛陽
方在上春務達陽氣宜以正月十四十五十六日夜開
坊市門一任公私燃燈祈福庚寅親享太廟辛卯祀昊
天上帝于圓丘是日降雪盈尺帝昇壇而雪霽禮畢御

五鳳樓宣制大赦天下賜南郊行事官禮儀使趙光逢
以下分物甲午上御文思殿宴羣臣賜金帛有差丙申
賜文武官帛有差命宣徽使王殷押絹一萬足并茵褥
圖幣二百六十件賜張宗奭

歐陽史丙申羣臣上尊號
曰睿文聖武廣孝皇帝

改西京貞觀殿為文明殿含元殿為朝元殿二月改思
政殿為金鑾殿勅東都曰自昇州作府建邑為都未廣
邦畿頗虧國體其以滑州酸棗縣長垣縣鄭州中牟縣
陽武縣宋州襄邑縣曹州戴邑縣許州扶溝縣鄆陵縣

陳州太康縣等九縣宜並割屬開封府仍昇為畿縣

輿地

廣記朱梁時楊氏據江淮于是吳越錢氏上言以淮寇未平恥聞逆姓請改松陽縣為長松

丁酉宴

羣臣于崇勲殿甲辰又宴羣臣于崇勲殿蓋藩臣進賀

勉而從之丙午宗正寺請修興極永安光天咸寧諸陵

並令添修上下宮殿栽植松柏制可癸亥勅豐沛之基

寢園所在悽愴動關于情理充奉自繫于國章宜設陵

臺兼升縣望其輝州碭山縣宜為赤縣仍以本縣令兼

四陵臺令同州節度使劉知俊奏延州都指揮使高萬

興部領節級家累三十八人來降三月以萬興檢校司徒為丹延等州安撫招討等使辛未詔曰同州邊隅繼有士衆歸化暫思巡撫兼要指揮今幸蒲陝取九日進發甲戌車駕發西都百官奉辭于師子門外丁丑次陝州己卯次解縣河中節度使冀王友謙來奉迎庚辰至河中府幸右軍舊杏園講武丙戌以朔方節度使兼中書令韓遜為潁川王遜本靈州牙校唐末據本鎮朝廷因而授以節鉞四月丙申朔駐蹕河中壬寅辰時駕巡

于朝邑縣界焦黎店冀王友謙及宗政內諸司使扈從
至申時迴己亥御前殿宴宰臣及冀王友謙扈從官甲
寅宴宰臣及扈從官于內殿制易定節度使王處直進
封北平王福建節度使王審知封閩王廣州節度使劉
隱封南平王同州節度使劉知俊封大彭郡王山南東
道節度使楊師厚封弘農郡王五月乙丑朔朝遂命宰
臣及文武百官宴于內殿己卯車駕至西京癸未御崇
勲殿宴宰臣及文武官四品以上己丑復御崇勲殿宴

宰臣文武官四品以上升宋州為宣武軍節鎮仍以毫
輝潁為屬郡六月庚戌同州節度使劉知俊據本郡反
制令削奪劉知俊在身官爵仍徵發諸軍速令進討如
有軍前將士懷忠烈以知機賊內朋徒憤脅從而識變
便能梟夷逆豎擒獲凶渠務立殊功當行厚賞活捉得
劉知俊者賞錢一萬貫文便授忠武軍節度使並賜莊
宅各一所如活捉得劉知浣者賞錢一千貫文便與除
刺史有官者超轉三階無官者特授兵部尚書如活捉

得劉知俊骨肉及近上都將竝梟送闕廷者賞賜有差
辛亥駕至蒲陝文武百官于新安縣奉迎劉知俊弟內
直右保勝指揮使知浣自雒奔至潼關右龍虎軍十將
張溫以上二十二人于潼關擒獲劉知浣送至行在敕
劉知浣逆黨之中最為頭角龍虎軍親兵之內實冠爪
牙昨者攻取潼關率先用命尋則擒獲知浣最上立功
頗壯軍威將除國難所懸賞格便可支分許賜官階固
須除授但昨捉獲劉知浣是張溫等二十二人一時向

前共立功效其賞錢一千貫文數內一百貫文與最先打倒劉知浣衙官李稠四十三貫文與十將張溫二十人各與錢四十二貫八百五十文立功勅命便授郡府亦緣同時立功人數不少所除刺史難議偏頗宜令逐月共支給正刺史料錢二百貫文數內十將張溫一人每月與十貫文餘二十一人每月每人各分九貫文仍起七月一日以後支給人與轉官職仍勘名銜分析申奏當與施行是月知俊奔鳳翔同州平七月乙丑勅行

宮將士陣歿者咸令所在給槨殯津置歸鄉里戰卒聞之悉感涕丙寅命宰臣楊涉赴西都以孟秋享太廟改章善門為左右銀臺門其左右銀臺門卻改為左右興善門敕大內皇牆使諸門素來未得嚴謹將令整肅頒示條章宜令控鶴指揮應于諸門各添差控鶴官兩人守帖把門其諸司使并諸司諸色人並勒于左右銀臺門外下馬不得將領行官一人輒入門裏其逐日諸道奉進客省使于千秋門外排當抗勒控鶴官昇臺至內

門前準例令黃門殿直以下昇進輒不得令諸色一人到千秋門內其興善門仍令長官關鎖不用逐日開閉是日又敕皇牆大內本尚深嚴宮禁諸門豈宜輕易未當條制交下因循苟出入之無常且公私之不便須加鈐轄用戒門閭宜令宣徽院使等切准此處分進封幽州節度使河間郡王劉守光為燕王

通鑑七月癸酉帝發陝州乙亥至洛

陽寢疾

己丑夕寢殿棟折詰旦召近臣諸王視棟折之迹帝慘然曰幾與卿等不相見君臣對泣久之遂詔有司

釋放禁人從八月朔日後減膳進素食禁屠宰避正殿
修佛事以禳其咎商州刺史李稠棄郡西奔本州將吏
以都牙校李玫權知州事八月甲午以秋稼將登霖雨
特甚命宰臣以下禱于社稷諸祠詔曰封獄告功前王
重事祭天肆覲有國恒規朕以眇身恭臨大寶既功德
未敷于天下而灾祥訝降于城中慮于告謝之儀有缺
齋虔之禮爰修昭報用契幽通宜令中書侍郎平章事
于兢往東嶽祭拜禱祀訖聞奏又勅朕以干戈尚熾華

夏未寧宜循卑菲之言用致雍熙之化起八月一日常朝不御金鑾崇勲兩殿只于便殿聽政辛亥制諸郡如有陣歿將士仰逐都安存家屬如有弟兄兒姪便給與衣糧充役贈故山東道節度使畱後王珣太保贈故同州觀察判官盧匪躬工部尚書珣故河陽將累以軍功為郡守主畱事于襄陽為小將王求所殺匪躬嘗為劉知俊判官知俊反不偕行為亂兵所害勅建國之初用兵未罷諸道章表皆繫軍機不欲滯畱用防緩急其諸

道所有軍事申奏宜令至右銀臺門委客省畫時引進

諸道公事即依前四方館准例收接司天臺奏今月二

十七日平明前東南丙上去山高三尺以來老人星見

測在井宿十一度其色光明闊大敕所在長吏放雜差

役兩稅外不得妄有科配自今後州縣府鎮凡使命經

過若不執勅文券並不得妄差人驢及取索一物已上

又今歲秋田皆期大稔仰所在切如條流本分納稅及

加耗外勿令更有科索切戒所繇人更不得于鄉村乞

託擾人閭八月襄陽叛將李洪差小將進表帝示以舍
宏特賜勅書慰諭又制左馮背叛元惡遁逃如聞相濟
之徒多是脅從之輩若能迴心向國轉禍全身當與加
恩必不問罪仍令同華雍等州切加招諭如能梟斬溫
韜或以鎮寨歸化必加厚賞仍獎官班兼委本界招復
人戶切加安存己卯幸西苑觀稼

舊五代史卷四

舊五代史卷四攷證

梁太祖紀四二月○案通鑑二月癸亥酖殺濟陰王于曹州新唐書昭宣帝紀亦云二月遇弑歐陽史作正月己亥卜郊于西都弑濟陰王與諸書異

辛巳以同州節度使劉知俊為潞州行營招討使○案辛巳歐陽史通鑑俱作壬午

時帝在澤州拜二相于行在○案通鑑云癸巳張文蔚卒癸卯楊涉罷為右僕射是二相之拜以代文蔚涉

也又承旨學士梁代避諱改為奉旨通鑑及歐陽史
仍作承旨

壬子幸東京○案五代春秋作丙午帝還東都歐陽史
作壬子至津州惟通鑑與是書同

淮寇侵軼潭岳邊境○侵軼原本作侵軼今據文改正
王師敗于潞州○案潞州之敗歐陽史作五月己丑通
鑑作壬申

帝以此郡五嶺三湘水陸會合之地○此郡原本作北

郡今據文改正

時代綿寢○綿寢原本作綿浸今據通鑑注改正

丙戌至陝州○丙戌通鑑作乙酉

丁巳至東都○案通鑑考異引編遺錄作乙卯實錄作丁巳今攷五代春秋作丁巳與是書同歐陽史作丁未與是書異

許州扶溝縣○案扶溝下原本脫縣字今據文增入

甲寅福建節度使王審知封閩王廣州節度使劉隱封

南平王○甲寅通鑑作庚子與是書異

如活捉得劉知浣者賞錢一千貫文○案一千原本作
一萬今據通鑑長編引梁代賞功之典改正

辛亥駕至蒲陝○案通鑑作癸丑帝至陝與是書前後
異

其興善門仍令長官關鎖○興善原本作章善今據上
文及五代會要改正

按巴堅舊作阿保機今改